

**ISIXHOSA ULWIMI LOKUQALA OLONGEZELELWEYO: IPHEPHA I**  
**ISIXHOSA FIRST ADDITIONAL LANGUAGE: PAPER I**

Ixesha: 2½ liyure

Amanqaku: 100

---

**QAPHELA**

1. Eli phepha linamacandelo amane.

ICANDELO A: Izicatshulwa (30)

ICANDELO B: Ushwankathelo (10)

ICANDELO C: Imibongo (30)

ICANDELO D: Ukusetyenziswa kolwimi (30)

2. Phendula yonke imibuzo ngesiXhosa.

3. Funda ngenyameko uze uphendule imibuzo ngokwemiyalelo yayo.

4. Umthamo wempendulo mawukhokelwe ngamanqaku.

5. Qwalasela upelo nolwakhiwo lwezivakalisi.

6. KwiCandelo C **unyanzelekile** ukuba uwuphendule **Umbuzo 3.1**, umbongo ongamiselwanga.

7. Nombola iimpindulo zakho ngokwendlela esetyenzisiweyo kwiphepha lemibuzo.

8. Bhala ngokucacileyo nangokucocekileyo.

---

## ICANDELO A IZICATSHULWA

### UMBUZO 1

- 1.1 Funda esi sicutshulwa silandelayo ngenyameko uze uphendule imibuzo engezantsi kwaso:

#### IZIYOBISI



- 1 Iziyobisi ziyingozi kuba ziyalibulala ilizwe, ziyayitshintsha ingqondo nesimilo somntu. Iziyobisi zilibulele ilizwe ngakumbi ulutsha. Umntu ozisebenzisayo uye enze izinto ezimbi kakhulu. Iziyobisi zidala isibindi nokuzithemba, umntu acinge ukuba nguye yedwa umntu onamandla. Umntwana uye angabamameli abazali bakhe. Uthi umntu akuzitya iziyobisi axhomise, abe, axabane okanye angahlalisani kakuhle nabanye abantu, uye adlwengule de abulale. Ingxaki enkulu yindlela ezisetyenziswa ngayo nomlinganiselo wazo ungaphaya. Abantu abaninzi bayazixuba ezi ziyobisi.
- 2 Zininzi iindidi zeziyobisi. Kukho ezisemthethweni ezifana namayeza, ezi ziphuma ngemvume kagqirha. Kukho ezingekho mthethweni, ezi ke akuvumelekanga ukuba zenziwe, zithengiswe okanye zisetyenziswe. Ukuba bekusiya ngokokholo lwabantu abazisebenzisayo, uRhulumente ngephumeza umthetho ogunyazisa ukuba zithengiswe, zisetyenziswe elubala. Iziyobisi zisetyenziswa ngabantu ngabantu, kwiimeko ngeemeko, ngeendlela ngeendlela. Abantu bazisebenzisa kakhulu iziyobisi kuba abasebenzi okanye abaphangeli kwaye imisebenzi inqabile. Ezi meko zibangela ukuba iziyobisi zinwenwe. Kulula ukujoyina amaqela asebenzisa iziyobisi kodwa kunzima kakhulu ukuphuma. Iziyobisi ezixhaphakileyo zezi: yintsangu, utywala, iglu, *icocaine*, *inicotine*, *i-LSD*, *isteroids*, *imandrax*, *i-ectasy*, *iherooin*, njalo-njalo. Abantu bayazisela, bayazifukutha bazitofe ngeziyobisi besebenzisa iinaliti.

- 3 Iziyobisi ziyinzuzo kubantu abazithengisayo. Zisithathela abantu sibathanda. Zitshintsha ubuhlobo kuvele ubutshaba nentiyano. Abasebenzisi bazo zibenza babe nolunya, bangabi nambeko nantlonipho. Kuphela isidima sabo. Intwana encinane umntu athe wayisela yotywala yenza loo mntu afune ukuzula apha esithubeni. Emva koko lo mntu uphathwa yibhabhalaza. Uthi akutshaya umntu aphinde anqanqatheke afune icuba. Akukhathaliseki nokuba iziyobisi zivumelekile – oko kukuthi zisemthethweni – okanye azivumelekanga, ziyasetyenziswa ngabantu.
- 4 Iziyobisi zinobungozi empilweni yomntu kwaye zineziphumo ezibi. Zinako ukumenza umntu aphelelwe ziingqondo abe ligeza. Zenza abantu babe zizilwanyana. Iziyobisi kwabanye abantu zenza amalungu omzimba angasebenzi kakuhle. Iziyobisi ziyababulala abanye abantu. Kubuhlungu ukubona bantwana beyoba ziziyobisi. Ulutsha luye luthengise izinto zexabiso zabazali babo kuba befuna ukuthenga iziyobisi. Iziyobisi zisithathela abantu esibathandayo. Zitshintsha ubuhlobo kuvele iintshaba.
- 5 Iziyobisi zenza abantu baphelelwe yimbeko. Abantu abasebenzisa iziyobisi benza izinto ezimbi elubala bejongiwe kuba abanazo iintloni. Icebo kukuba zivalwe apho zivela khona ezi ziyobisi. Kufuneka kubanjwe abantu abazithengisayo nabantu aba bazithengayo. Abantu mabangavunyelwa ukuba baye kwiindawo apho kuthengiswa khona iziyobisi. Makuyekwe ukusetyenziswa kweziyobisi, maziyekwe izenzo zobubi, makulawule ubuntu. Phantsi ngeziyobisi, phantsi ngemikhwa nemikhuba yazo!
- 6 Kuni lutsha ikamva lelenu, balumkeleni ootsotsi abafuna ukuphila ngani. Bajikelezisa izitulo, bakhupha imiyalelo, bahlala tofo-tofo kamnandi. Lutsha, yahlukanani nokufuna ukuphila ubomi obumnandi ngokusebenzisa iziyobisi. Aba tsotsi baniqhatha ngokunirhalisela ngemali efumaneka lula, lo ndlela lula uyakunisa engcwabeni, nife nisebancinane.

[Sithathwe kwincwadi-*Igrama noncwadi LwesiXhosa 12* saze salungiselelwa uFAL ngabakwa-IEB]

Iglosari	
Axhomise	Akhuthuze
Ezixhaphakileyo	Ezaziwa kakhulu
Zinako	Ziyakwazi
Izinto zexabiso	Izinto ezidulu/duru
Elubala	Ekuhlani/bengazifihli
Imikhwa/imikhuba	Izenzo ezimbi

1.1.1 Kumhlathi woku-1:

- (a) Ziyingozi njani iziyobisi? Nika izizathu zibe **zibini**. (2)
- (b) Ngoobani ababulalwa kakhulu ziziyobisi? (1)

1.1.2 Kumhlathi wesi-2:

- (a) Nika izizathu esibangela ukuba abantu basebenzise iziyobisi. (1)
- (b) Bhala iindidi zibe **zibini** zeziyobisi. (2)

- 1.1.3 Kumhlathi wesi-4, iziyobisi ziyingozi njani empilweni yomntu? (2)
- 1.1.4 Kumhlathi wesi-5, umbhali ucebisa ukuba kwenziwe ntoni ngabantu abathengisa iziyobisi nabazithengayo? (2)
- 1.1.5 Bhala phantsi umyalezo wombhali weli nqaku. (2)

**[12]**

1.2 Funda le ncoko uze uphendule imibuzo:



(Kusedolophini eRhini. UWela unxibe impahla ezimdaka ezikrazukileyo. Uphathise umntu owehlika ebhasini impahla. Udibana noLizo awayekhula naye. ULizo ukhumbule indlela awayebhulishwa ngayo nguWela besafunda esikolweni.)

**Lizo:** Molo mhlobo wam, usandikhumbula?

**Wela:** Andikukhumbuli, ungubani kanene?

**Lizo:** Mamela ke ndikuxelele. Ndandifuna ukuba ngumhlobo wakho esikolweni, waze wena awandifuna. Ndingulo wawudla ngokumthathela imali yokuthenga *etuck shop*. Uyandikhumbula ke ngoku?

**Wela:** Owu! Uthi wawubhulishwa ndim?

**Lizo:** Phulaphula kakuhle Wela. Esikolweni wawusoloko undikhaba ngezihlangu ndilila yonke imihla.

**Wela:** Ndicela imali yesonka ndilambile.

**Lizo:** Mamela apha Wela, ndifuna undazi. Ndim lowa wawumkhaba, umbetha. Uyakhumbula ukuba wawundithuka ude undithufele ngamathe?

**Wela:** (Eneentloni) O-o! U ... u ... uLizo! Lizo Mbeki! Mfondini, andikholelwa! Molo mfondini. Nguwe lo Lizo? Yhee mfondini, yimoto yakho le intle kangaka?

**Lizo:** Ewe, Wela yimoto yam le. Inene ubomi yenye into. Kule minyaka mininzi sahlukanyayo, ndaye ndafundela ubugqwetha. Ngoku ndivule i-ofisi apha eRhini.

**Wela:** (Elila) Lizo, Lizo, ndicela uxolo. Nceda undixolele.

**Lizo:** Ndikuxolele, Wela. Qha ndifuna wazi ukuba ukundibhulisha kwakho esikolweni kwandenza ndomelela. Ukusukela ngoku, mna nawe singabahlobo. Khwela sihambe, siza kusebenza kunye.

[Sithathwe kwincwadi-*Ukhanyo* saze salungiselelwa uFAL ngabakwa-IEB]

<b>Iglosari</b>	
-thufela	-tshicela

- 1.2.1 Ingaba uLizo wayefuna ukuba ngumhlobo kaWela ngokuya babesesikolweni? **EWE okanye HAYI?** Xhasa impendulo yakho **ngokucaphula** kule ncoko. (2)
- 1.2.2 UWela wayempha uLizo imali yokuthenga *eTuck Shop*. **YINYANI okanye BUBUXOKI?** Xhasa impendulo yakho **ngokucaphula** kule ncoko. (2)
- 1.2.3 Chaza ukuba uLizo wayebhulishwa njani nguWela. Nika iindlela zibe zibini. (2)
- 1.2.4 Ucinga ukuba uLizo ungumntu okhohlakeleyo okanye ungumntu olungileyo? Xhasa impendulo yakho **ngokucaphula** kule ncoko. (2)
- 1.2.5 Ingaba ukubhulisha abanye abantwana ezikolweni kuyinto elungileyo? **EWE okanye HAYI?** Xhasa impendulo yakho ngokubhala izizathu zibe zibini. (2)

**[10]**



## ICANDELO B USHWANKATHELO

### UMBUZO 2

Funda esi sicutshulwa singezantsi usishwankathele ngawakho amazwi.

#### QAPHELA:

- Bhala amagama angama-60 ukuya kwangama-70 ukubonisa ukuqonda.
- Bhala ingongoma ibe NYE kwisivakalisi ngasinye.
- Ungabhala izivakalisi **ezihlanu ezinomthamo OKANYE**
- Umhlathana **OKANYE**
- Incoko.
- Isivakalisi okanye ingongoma nganye mayiqale ngesenzi.
- Bhala phantsi inani lamagama owasebenzisileyo ezantsi kwesishwankathelo.

#### NDIYABATHANDA ABAHLOBO BAM NGENTLIZIYO YAM YONKE



Sonke singabantu siyafuna ukuba nabahlobo abasenyonweni. Xa ungumntwana omncinane ukhula, usapho lwakho lolona lubaluleke kakhulu ngaphezu komntu wonke. Kodwa xa ukhula kufuneka ungahlobani nabantu bakowenu kuphela. Kufuneka uzame ukwazi abantu ngabantu nezinto abanomdla kuzo. Xa uneminyaka eli-13 ukuya phezulu kulula ukwenza abahlobo abalingana nawe. Abahlobo bakho banolu lwazi nawe unalo, ngoko kulula ukuncokola nabo. Abahlobo bakwenza uzive wamkelekile. Kuba nzima kakhulu kwaye kubuhlungu xa uziva ungamkelekanga ebantwini ocinga ukuba ngabahlobo bakho kwaye ucinga ukuba bayakuthanda.

Ukufumana abahlobo kunganzima kakhulu. Kufuneka umntu abe nexesha elaneleyo kunye nomonde. Ukulindela into yokuba ibe ngomnye umntu oza kuwe akuncokolise kukuzilibazisa nje. Kaloku "Nguwe" ekufuneka uye emntwini umncokolise. Le nto iba yingxaki kulutsha olusakhulayo kuba umntu woyika ukungamkelwa. Enye indlela yokwenza abahlobo kukudibana nabanye abantu abathanda izinto ozithandayo nawe. Esikolweni abantu bayakwazi ukuba ngabahlobo kuba bethanda imidlalo efanayo okanye izifundo ezithile.



Okokuqala kubalulekile ukuba ube ngumntu onenyani. Yiba ngulo mntu unguye ungaguquguquki. Musa ukukhawuleza ugxeke abanye abantu ukhomba iimpazamo zabo. Ukugxeka kuza kwenza kube nzima kakhulu ukufumana abahlobo. Kulula kakhulu ukufumana abahlobo ukuba unengqondo ekwaziyo ukucingela abanye abantu. Babuze abanye abantwana ofunda nabo ngezinto abanomdla kuzo ezinjengomculo nemidlalo. Babuze imibuzo ngamakhaya abo nemvela phi yabo. Khumbula ukuba abantu bayathanda ukuthetha ngeziqo zabo. Mncome umntu owenza izinto ezintle. Xa umntu ekujongile, mncumele. Ukuba kukho omnye umntu othetha nawe, mpendule ngobubele.

Oyena mhlobo ngulowo ukuthandayo nokukhathaleleyo. Lo mhlobo akacingi kaninzi xa kufuneka ekuncedile. Ngumntu onokumxelela zonke iingxaki zakho ungenaxhala lokuba uza kuhamba ethetha ngawe ebantwini. Abahlobo benene ngabo unokuya kubo xa ufuna uncedo. Kufuneka ubaxelele inyaniso ukuze bakuxhase ngawo onke amaxesha. Umhlobo wenene ukwenza uzive wamkelekile kwaye ungumntu oxabisekileyo. Umhlobo wenene ngumntu ongasokuze akushiye, usoloko ekunye nawe ngakumbi ngamaxesha anzima.

Impilo entle ibangelwa bubudlelwane obuhle phakathi kwabahlobo. Kubalulekile ukubambisana kubekho umanyano phakathi kwabahlobo. Kuthi kwakuba mnandi, kube njalo, wonke umntu abe neminqweno emihle ebomini. Ubuhlobo iba bubuhlobo ngokuthi nenzelane ubuntu. Ubuhlobo bufuna abantu abathembekileyo nabanyanisekileyo.

[Indyabo: V.Nomlomo no-T. Voyi]

**10 amanqaku**

## ICANDELO C      ISIHOBE

Phendula yonke imibuzo esetwe kwimibongo.

### UMBUZO 3

#### 3.1 UMBONGO ONGAFUNDISWANGA

Funda lo mbongo ungezantsi uze uphendule imibuzo elandelayo.

**ENZULWINI: M. M. Duka**

- 1      Sasiselwandle ngeKilimesi,  
Babebaninzi abantu kunyakazela,  
Babekho phaya esantini  
Abatsibatsiba okwemivundla.
- 2      Bambi bedlaladlala elunxwemeni  
Amaza ebetha iqatha,  
Babambene behlekela phezulu,  
Bengathandi ukuya enzulwini.
- 3      Enzulwini kumnandi kuseGcibhala kwiindadi,  
Zidade okweentlanzi, zithi tshoniyane,  
Ziphinde zithi thu emzuzwini zidlala namaza,  
Kuluyolo kuzo ukuhamba ngeliza.
- 4      Ngokuhlwa ekhayeni sancokola  
Ngomcimbi onencasa wemfundo eyiyo;  
Noko kuhle ukuqala enyeleni  
Masiye kuyo inzulu yolwazi.

Kwisitanza soku-1:

- 3.1.1 Nika indawo ababekuyo aba bantu ngale mini. (1)
- 3.1.2 Chonga igama elibonisa ukuphithizela kwabantu kumqolo wesi-2. (1)
- 3.1.3 Bhala phantsi **isifaniso** esisetyenziswe yimbongi. (1)

Kwisitanza sesi-2:

- 3.1.4 Babedlala phi abanye abantu? (1)
- 3.1.5 Ayebetha ndawoni amaza emzimbeni? (1)
- 3.1.6 Khankanya into ebonisa ukuba abantu abafuni ukuya enzulwini. (2)

Kwisitanza sesi-3:

3.1.7 Kuphi eGcibhala? Khetha impendulo kwezi:

- A Yindawo ekugcinwa kuyo izilwanyana.
- B Yindawo apho kumnandi khona okanye.
- C Yindawo yokungcungcutheka. (1)

3.1.8 Kumqolo wesi-4, khangela **isithethantonye** seli gama, "kuluvuyo". (1)

3.1.9 Kwisitanza sesi-4: Imbongi ithi makuyiwe phi? (1)

**[10]**

### 3.2 IMIBONGO EFUNDISIWEYO

#### UTHANDO LOBUZALI: M. M. M. Duka

- 1 Thando lobuzali, thando oluyinqobo.  
Thando olungummangaliso elibuThixorha.  
Lugubungela njalo okolwandle  
Zonke iimpazamo zethu.
- 2 Luxhalabile bubuthathaka babantwana balo.  
Londla neenkedama ezizimo zicekethekileyo,  
Londla ngobusi nentusi eyiyo,  
Ubusi nobisi lwemfesane yenene.
- 3 Lusiso isiseko sobuntu bethu.  
Sakuhexa eso siseko kushukuma ilizwe.  
Ziwe zidilike ezinye izizwe.  
Zibhange ziphele zibhubhe emhlabeni.
- 4 Olu thando luxhasa umzaneno,  
Lukwanguwo nomzaneno wekhaba.  
Lulilitha kwiintsunguzi zomhlaba,  
Amahlathi amnyama obu bomi.
- 5 Obu bomi obunamakrele,  
Neentsini ezingamakrele.  
Olu thando yinkuselo kumakrele,  
Lulikhaka nekrele kumzabalazo wokuphila.
- 6 Ndithini na ukuthetha ngalo olu thando?  
Lufikelela mbombo zone zehlabathi.  
Lunabantwana abayintlabathi yehlabathi.  
Luneminqweno emihle okweenkwenkwezi zezulu.

Kwisitanza soku-1:

3.2.1 Cacisa ukuba uthando oluyinqobo luthando olunjani? (1)

3.2.2 Chonga igama elithetha into enye **nokufihla** kumqolo wesithathu. (2)

Kwisitanza sesi-2:

3.2.3 Nika **isafobe** esisetyenziswe yimbongi kumqolo wesine. (1)

Kwisitanza sesi-3:

- 3.2.4 Yintoni umsebenzi wothando lobuzali? (2)
- 3.2.5 Nika umzekelo wemfanozandi. (1)

Kwisitanza sesi-5:

- 3.2.6 Shwankathela ngesivakalisi esinye okuthethwa yimbongi kwesi sitanza. (2)

Kwisitanza sesi-6:

- 3.2.7 Nika **isixhobo sokubonga** esisetyenziswe yimbongi kumgca/kumqolo woku-1. (1)
- [10]**

3.3 Funda lo mbongo ungezantsi uze uphendule imibuzo:

UTHANDO: P. M. Mafilika	
1	Maxa wambi luchulumanco Maxa wambi yincindi yekhala lingcambu zakho azaziwa ezweni Wena ufana nemozulu; Wena uyi-erosi kumaGrike Usisikhondo sentliziyo e-Afrika.
2	Kwabanye udala ulonwabo Kwabanye udala unxunguphalo Wena awufuni bhetyebhetye Ufuna umntu onomqolo; Wena erosi kumaGrike Sitya sobungcwele e-Afrika.
3	Uxwaya i-ethe-ethe, Ulise kwaNtsonganyawana Kanti isomeleli Usishiya sithe qoko. Wena erosi kumaGrike Siseko solwendo e-Afrika.

Kwisitanza soku-1:

- 3.3.1 Nika **isixhobo sokubonga** esisetyenziswe yimbongi kwimigca/  
kwimiqolo yokuqala emibini. (1)
- 3.3.2 Kutheni imbongi ifanisa uthando nemozulu? (2)
- 3.3.3 Nika **isafobe** esisetyenziswe kumqolo wesi-3. (1)
- 3.3.4 Cacisa okuthethwa kumqolo wesi-6. (1)

Kwisitanza sesi-2:

- 3.3.5 Shwankathela ngawakho amazwi okuthethwa yimbongi kumqolo  
wesi-5 nowesi-6. (2)
- 3.3.6 Ibhetyebhetye ngumntu onjani? Khetha impendulo kwezi:
- A Ngumntu otyebileyo.  
B Ngumntu ongomelelanga.  
C Ngumntu oligeza. (1)

Kwisitanza sesi-3:

3.3.7 Kuphi kwaNtsonganyawana? (1)

3.3.8 Caphula umgca/umqolo apho imbongi isebenzise **isifanekisozwi**. (1)  
**[10]**

**30 amanqaku**

## ICANDELO D UKUSETYENZISWA KOLWIMI

### UMBUZO 4

Bhala kwakhona ezi zivakalisi zingezantsi uze ubhale **ISINCIPHISO** endaweni yegama elikrwelelwe umgca ngaphantsi:

- 4.1 Wangena umfo kuloo ndlu yayinamadoda. (1)
- 4.2 Uqhube imoto yakhe waleqa eKapa. (1)
- 4.3 Iilokhwe zabo ziyifanele loo mizimba yabo. (1)
- [3]**

### UMBUZO 5

Bhala kwakhona ezi zivakalisi zingezantsi uze unike **ISICHASI** segama elikrwelelwe umgca ngaphantsi:

- 5.1 UNomsa yintwazana etyebileyo. (1)
- 5.2 Ndithenge isonka esibandayo. (1)
- 5.3 Vula umnyango kuyabanda. (1)
- [3]**

### UMBUZO 6

Gqibezela le tshati njengoko ubonisiwe:

Umntwana	lo	ngumntwana	olungileyo.
Indoda	6.1 _____	yindoda	elungileyo.
Abantu	aba	ngabantu	6.2_____.
Izilwanyana	ezi	6.3_____	ezilungileyo.
Usana	6.4	lusana	olulungileyo.

**[4]**



### UMBUZO 7

Bhala kwakhona ezi zibizo zingezantsi zibe kwi**SANDISO**.

- 7.1 Ilizwe (1)
- 7.2 Umlambo (1)
- [2]**

### UMBUZO 8

Bhala kwakhona ezi zivakalisi zingezantsi uze usebenzise **IZIVUMELANISI** ezifanelekileyo ukuze icace kwaye ivakale intetho yakho.

- 8.1 Usisi uthenge ijezi (-tsha). (1)
- 8.2 Le venkile ithengisa ukutya (-bi). (1)
- 8.3 Le ncwadi endiyifundayo (-khulu). (1)
- 8.4 Ilokhwe yale ntombazana (-dala). (1)
- [4]**

### UMBUZO 9

Bhala ezi zivakalisi uze **ufakele amagama abuzayo/ iimpawu zemibuzo** kwezi zivakalisi ukuze zinike intsingiselo. Khetha kula magama:

<b>phi</b>	<b>ngubani</b>	<b>kutheni</b>
------------	----------------	----------------

- 9.1 \_\_\_\_\_ othathe le mali? (1)
- 9.2 Bafunda \_\_\_\_\_ aba bantwana? (1)
- 9.3 \_\_\_\_\_ nisitshona nje isiXhosa? (1)
- [3]**

### UMBUZO 10

Bhala ezi zivakalisi zingezantsi **kwimo elandulayo**.

- 10.1 Abantwana besikolo badiniwe. (1)
- 10.2 Nanku umntu othethayo. (1)
- 10.3 Thina sibhaka izonka. (1)
- [3]**

### UMBUZO 11

Bhala kwakhona ezi zivakalisi zingezantsi zibe **KWINGXELO-NTETHO**.

- 11.1 UThandi: "Ndiya esikolweni namhlanje." (1)
- 11.2 UJohn: "Niya phi?" (1)
- 11.3 Utata: "Ruth, hlamba izitya." (1)
- [3]**

### UMBUZO 12

Nika **isalathandawo** segama ngalinye elikwisibiyeli:

- 12.1 Ndiya (makhulu) ngoDisemba. (1)
- 12.2 Kufike iindwendwe (khaya). (1)
- 12.3 Kukho imifanekiso (incwadi). (1)
- [3]**

### UMBUZO 13

Bhala kwakhona ezi zivakalisi zingezantsi uze usebenzise **isimelabizo** esifanelekileyo. Khetha kwezi:

<b>yona</b>	<b>yena</b>	<b>nina</b>	<b>wona</b>
-------------	-------------	-------------	-------------

- 13.1 Utata \_\_\_\_\_ usebenza edolophini. (1)
- 13.2 \_\_\_\_\_ anifuni kusebenza. (1)
- [2]**

**30 amanqaku**

**Ewonke amanqaku: 100**